

Las duas Jugoslavias

Da retg Alexander a Karadzic

DA GUIU SOBIELA-CAANITZ

■ **En ils davos onns dal tschientaner passà han guerras balcanaisas mess fin a la vita d'ina Jugoslavia federala, la segunda Jugoslavia, stgaffida 1945. Renconuschids èn oz sis stadis successurs slavs ed in settavel («Republika Kosova») cun ferma maioritad albanaisa. Croazia e Slovenia fan part da l'Uniun europeica (UE).** «2012 vivevan en Svizra (...) 79 261 personas da naziunalitad cosovara e 61 668 da naziunalitad macedona» (Google). Quels decennis jugoslavs han tuttina sviluppà in'atgna furma da varietad linguistica. Il domini da Josip Broz Tito (1892–1980), naschì en Croazia, ha già ina litteratura vairamain jugoslava. Conuschent è il diplomat e scriptur Ivo Andric (1892–1975), naschì e creschì si en Bosnia, premi Nobel da litteratura 1961, «per sia forza epica tar la descripziun da l'istorgia da ses pajais», mort a Belgrad sco Serb. Michael Martens (*1973), dapi 2002 correspondent politic da la «Frankfurter Allgemeine Zeitung», ha gist publictà ina biografia d'Andric*. Lez ha scrit 1920 in essai ch'ins po resguardar sco profetic: «Brev da l'onn 1920.» Là manegiava'l: «La Bosnia è in pajais da la tema e da l'odi (...). En la Bosnia ed en l'Erzegovina datti daplì umans ch'utrò che fissan pronts da mazzar e da sa laschar mazzar, e quai per ils motivs ils pli variads» (pp. 447–448).

Dal reginam a la federaziun ed a las guerras

Lezza brev profetica ha Andric scrit 1920, pia en l'emprima Jugoslavia, uniun sfurzada da Serbs, Croats e Slovans pro-



Radovan Karadzic.

MAD

clamada il november 1918 e renconuschida il matg 1919 a Paris da la conferenza da la pasch. 1929 ha Alexander (1888–1934), il retg serb dal pajais, numnà ses stadi Jugoslavia (da «jug» = «sid»). Lezza Jugoslavia è entrada cunter veglia en la Segunda Guerra mundiala ils 6 d'avrigl 1941: «Sistschient pilots da guerra tudestgs han bumbardà Belgrad. Millis umans èn morts» (p. 259). Uschia ha la Germania reagì al putsch d'uffiziers naziunalists serbs stimulads da la Gronda Britannia. La Germania e ses alliads han attatgà la Jugoslavia, parcellà ses intschess e stgaffì il stadi independent fashistic da Croazia. Retg Peder (1923–1979) è fugì a Londra. Suentar onns da guerra civila, cumbats e mazzacras ha la resistenza comunista triumfà cun ses schef Tito. Il parlament, elegì ils 11 da november 1945 e manà dals commu-

nists, ha proclamà ils 29 la «Republica federala populara da Jugoslavia», pia la segunda Jugoslavia. Sia constituziun da 1974 defineva sis republicas federadas (slavas) e duas provinzas autonomas aifer la Serbia, numnadain la Cosova, cunzunt albanaisa, e la Vojvodina/Vajdaság, cun oz var 13% umans da lingua ungaraisa. Suentar la mort da Tito è il naziunalissem dals Serbs creschì, cunzunt cunter ils Cosovars. Ina dieta extraordinara da la Lia dals communists jugoslavs (1990) ha renconuschì il pluralissem politic. Trais republicas federadas jugoslavas èn sa decleradas independentas il 1991: La slovena e la croata, ils 25 da zercladur, sco era la macedona, suentar in agen referendum ils 8 da settember. Questa davosa republica ha num «Macedonia dal nord» dapi 2019, per evitar confusiuns cun las provinzas grecas numnadas «Macedonia centrala» (chapitala Tesaloniki), «Macedonia dal vest» e «Macedonia e Trachia». Ils 9 da schaner 1992 ha il nov parlament serb da Bosnia-Erzegovina a Banja Luka proclamà in'atgna republica ed elegì president il naziunalist serb Radovan Karadzic (*1945); uschia ha cumenzà la guerra bosniaca. Quai è stà la fin da la segunda Jugoslavia.

Il Balcan dal vest ans riguarda

Quel intschess patescha anc adina da las guerras ch'han furià là gist avant l'onn 2000. Las tschintg anteriuras republicas jugoslavas ordaifer l'UE paran d'interessar pauc noss Occident; i han num Bosnia-Erzegovina, Croazia, Macedonia dal nord, Montenegro e Serbia, cun mintgamai 3427 olmas (il 2018), 4 124 531 (il 2017), 2 717 132 (il 2018), 627 373 (il

2017) e schizunt 6 982 604 (il 2018). La «NZZ» dals 10 da december 2019 scriva: «Il genocidi da Srebrenica e l'assedi da Sarajevo èn daventads avant strusch ventgatschintg onns, betg lunsch davent da la Svizra e da la Germania; ins ha perscrutà lezs malfatgs duidamain dal puntg da vista academic e giuridic, dentant èni strusch anc preschents» (p. 11). Il mars 2019 ha il Tribunal da l'ONU per crims da guerra (Den Haag) sentenzià Karadzic ad arrest per vita duranta, e quai t.a. pervi dal genocidi a Srebrenica e da l'assedi da Sarajevo. La «NZZ» dals 10 da december scriva: «La Cosova ha accumulà tut las cundiziuns per viajar libramain en il spazi da Schengen; ins na para dentant betg d'abolir l'oblig da visum. L'Albania e cunzunt la Macedonia dal nord han exequì refurmas che faschevan mal per finalmain metter ad ir tractativas d'admissiun en l'UE; dentant exprima il president franzos Macron [*1977] ses veto. Sias decleraziuns cunter la Bosnia (...) èn tuttafatg senza motiv (...). Quels stadis [balcanais] èn situads amez l'Europa e pudessan tuttina sa drizzar vers Moscau u Ankara». Sperain che l'UE d'Ursula von der Leyen e dal diplomat experimentà Charles Michel sappia agir en l'interess a lunga vista da noss continent.

Bibliografia:

* Michael Martens, *Im Brand der Welten. Vienna (Paul Zsolnay) 2019, ISBN 978-3-552-05960-3.*
Funtaunas:

– Ernest Weibel (Universitad da Neuchâtel), *Histoire et géopolitique des Balkans de 1800 à nos jours.* Paris (Ellipses) 2002, ISBN 2-7298-0907-4.

– Istituto geografico De Agostini, *Calendario Atlante De Agostini 2020, Novara (Piemunt) 2019, www.deagostinibri.it*